

THOMAS HVRTADO
CLERICVS REGVLARIS
Minor, vulgò *Peloso*,

IN RESOLVTIONE CONTROVERSI
de Communione pro Mortuis,

CVLSVS, AC DEPILATVS

A LEODEGARIO QVINTINO
Heduo Sacræ Theologiæ Doctore.



L V G D V N I,
Sumptibus MICHAELIS LIBERA

M. DC. LIII.
CVM PERMISSV.


INDEX PARAGRAPHORVM.

- A**rgumentum. 1
- I. Sententia Raynaudi de Communionem pro Mortuis. 2
- I. Doctrinam propositam singillat Thomas Hurtado. 6
- II. Iudicium de Hurtadi singillatione, primum quidem quoad conclamationem, in negatum à Raynaudo animabus Purgatorij gaudiorum ubertatem, & exquisitas delicias. 12
- V. De Raynaudi per Hurtadum criminatione, ob negatum, vel extenuatum communionis pro Mortuis fructum ex opere operantis quatenus satisfactiuo. 16
- Discussa Raynaudi per Hurtadum excogitatio, ob sublatum, vel imminutum fructum communionis pro mortuis ex opere operantis impetratorio. 22
- I. De eodem fructu communionis pro mortuis ex opere operato, siue Sacramenti, communiter exploso: siue alio, recens ac primum ex ingenio per Hurtadum fabrefacto. 27
- II. De Raynandi per Hurtadum exarmatione, prorsus omni autoritate: Et è contrario, de ostentatis ab Hurtado pro sua sententia autoritatibus. 31
- III. Scriptionis Hurtadi, characterismus, absolutè. 37
- X. De eodem characterismo scriptionum Hurtadi, respectiuè. 43
- Encomium Theophilo ab Hurtado depictum, quale. 48




REVEREN^{mo} IN CRIST. PAT.

RAPHAELI AVERSAE
THEOLOGO PONTIFICIO

VM primùm in fronte operis, cuius nunc particula
executio, calculus tuus candidus occurrit, PAT
SAPIENTI^{ssime}, gestiui legere, ratus solidam doctrinam
& scribendi accurationem tuam in opere tua autoritate com
munito, deprehendendam. Sed apparet, verè pridem prom
ciatum esse, nihil tam deficere supremos cœtum moderate
quàm veri noticiam. Ab extrema Iberia, per tot maris ter
que tractus, iudicium de libro suffragatione censorum prob
perfertur ad Generalem moderatorem: Quid mirum tot c
distentam mentem, edendi facultatem in fide suffragatorum, c
cessisse? Breviculum aberrationum, falsiloquiorum petule
tum, in opere non redolente tuam in scribendo gravitatem,
discutiendo subtilitatem & ingenium, in confutando modesti
in stabiliendis tuis placitis firmitatem ac soliditatem; rep
sentatum venio; non tam ut ex vngue leonem æstimes, quàm
estatum omnibus faciam, quantum sapientiæ tuæ ac iudicio
feram; & quod te Romana cortynæ ad gravissimas quasque
fide & doctrina sana disquisitiones consultum vult, & ad
scoporum examina adhibet, alibi quoque terrarum cum pl
excipi, & fauentibus iudiciis comprobari. VALE.

REVERENDISSIMÆ PATERNITATI T



Additissimus
LEODEGARIUS QUINTINVS.

APPROBATIO DOCTORVM.

IÆc lucubratio concinnata ad dispellendas offucias criminatio-
num, in magistrum optimum, deque Theologicis studiis bene-
ritum, luce digna est, quippe nihil continens siue sanæ doctrinæ,
e bonis moribus aduersans, imò solidam pietatem validè ac eruditè
bilians. Scriptum in Carmelo nostro die 3. Augusti anni 1653.

Fr. STEPHANVS MOLIN, *Carmelita Doctor Parisiensis.*
Fr. FRANCISCVS RENEVOT.

LICENTIA ORDINARII.

Quominus præfata lucubratio detur in publicum per nos non stat,
attento Doctorum Fratris Stephani Molin Carmelitæ, & Fratris
Francisci Renuot testimonio. Lugduni die 8. Augusti 1653.

DEVILLE, *Provicarius Generalis Lugdunen.*

CONSENSVS.

Isis suprà approbationibus, librum sic inscriptum: *Resolutio con-*
trouersa de communione pro mortuis, à MICHAËLE LIBERAT,
hac vrbe Typographo in lucem edi non impedito, cum prohibi-
tionibus, aliis omnibus hac de re fieri solitis. Actum Lugduni 8.
Augusti 1653.

VIDA VD.

PERMISSIO.

Ita iuxta conclusiones Procuratoris Regis, 8. Aug. 1653.

SEVE.



ARGUMENTVM.

QUO PVS CVLV M de Communione pro mortuis, triplici oppugnatione est impetitum. Primam instituit quidam Boghman, Prior S. Thomæ, qui libellum tunc primùm editum, infamavit de Hæresi Æriana; & Lutetiæ de sacro suggesto ostētatum, ignibus addicendum pronuntiauit, eo quòd tollat Missas pro defunctis. Sed hanc vecordem fuisse calumniam libri principium reuicit. Vnde Sycophanta illicò explosus est. Oppugnationem secundam adornauit Augustinus de Bellis, timens frequentia Communionis Feriâ qualibet secundâ institutæ apud S. Andream à valle: qua in parte frigidam affundere pietati populorum, negauit expedire, etiamsi libellum sanâ doctrinâ esse refertum, & Autorem euicisse, quod intendebat, vltro datum est. Cumque fuisset qui opponeret, si sana est libelli doctrina, falli ergo plebem, ex desiderio suos vita functos iuuandi communicantem; eâque communionem non iuuari reuerà mortuos, sed deludi viuos: responsum est à quodam pertinente ad titulum de clerico per saltum promotò, *Perinde esse, siue per veritatem, siue per falsitatem, Deo seruiatur, dummodò seruiatur.* Hæc oppugnationem, apud cordatos seipsam euertit, vt plenius dicitur in Historia Mariniana. Tertiam eiusdem libelli oppugnationem instituit Thomas Hurtado, ex Ordine Clericorum Regularium Minorum, qui

vulgò *Peloff* appellantur, tota resolutione 11. tractatus vltimi; longissimâ, & mole, libellum de quo agitur, æquante. Exhibuit se Hurtado totâ hac sua lucubratione, adeò *Pilosum*, vt, si Petri Blesensis vocem adhibere liceat, *Esaïna* prorsùs sit eius Oratio. Vnde *Esaï Seir* siue *Pilosus* denominari meritò possit, vt monstratum breuiter venio.

§. I.

Sententia Raynaudi de communione pro mortuis.

VT intelligatur, quid Hurtado reprehendat, compendio primùm referenda est doctrina Theophili Raynaudi, in quam Hurtado tantoperè concitatur.

Theophilus ergò vsurpans ipsissima verba S. Thomæ lect. 6. in c. 6. Ioannis, dixit, *laici, communionem pro mortuis, fieri per errorem*. Non vult dicere S. Thomas, interuenire errorem in fide, cùm quis ita communicat: sed errorem vocauit, eo sensu quo Laurentius Ioubertus, suum quoddam opus Medicum, inscripsit, *de erroribus popularibus in re medica*. Et quo Antonius Faber, opus quoddam iuridicum, *De popularibus Pragmaticorum erroribus*, in lucem emisit. Laicos ergo pro mortuis communicantes errare in hoc sensu, dixit cum S. Thoma, Raynaudus à num. 8. sui libelli. Et probauit primùm, ex sensu antiquo omnium ad hanc diem Theologorum, in primisque S. Thomæ loco annotato, & 3. p. q. 79. a. 7. explicatissimè tradentis, *Communione soli sumentis prodesse*. Nemo item eorum, qui hactenùs tractarunt de subsidiis mortuorum,

mortuorum, memoravit vnquam, Communionem: Quia viderunt omnes, Communionem esse subsidium, vel ferè, vel prorsùs inutile mortuis. Vñs antiquus Ecclesiæ, aliud habuit; nam cum astantes aliis sacris solerent communicare; in sacro tamen, quod pro defunctis fiebat, non communicabant. Et memini cùm circiter annos abhinc quadraginta, vñs communicandi pro aliis cœpisset in his oris induci, præstantem Theologiæ Professore, Ludouicum Michaëlis, validè præter cæteros, in eam (vt vocabat) insulsiatatem, ac iudicij inopiam, conclamasse; admonendo, perinde id esse, atque manducare pro alio, vel hominem sanum haurire pro ægro Pharmacum, quæ quanta foret absurditas, nemo non videt.

Harum rationum vim, sic aperuit Raynaudus. Si sumptio Eucharistiæ prodesset alij, quàm sument, vel prodesset ex opere operato, vel ex opere operantis. Priorem modum adhibuerat vnus quidam declamator, & adscripti erant in Libris Asceticis prelo subiectis, celebres scriptores duo. Et idcirco Theophilus, suam lucubrationem, ex instituto, ac per se primò, contra eam sententiam conscripsit: tamen si per eam occasionem, attigit quoque modum posteriorem, quo communio dicitur prodesse alteri, quàm sument, ex opere operantis, si à communicante dirigatur ad alterum. Verùm prior modus (vt Theophilus à num. 8. demonstrauit,) est apertè ridiculus, nec vlli vnquam solido Theologo probatus est: Tamen si ex quo vnus quidam, vt applauderet Berrabus, eaque communicando pro mortuis, velut æquare sacerdotem pro eis sacrificantem, effutiuit, (comperta narratio, & quantumlibet grunniat Hurtado, nequaquam conficta) vnus & alter, quos dixi, visi sunt

eam fatuitatem adamasse. Attamen eorum vnus lecta Theophili scriptione, depuduit vanitari, & in altera editione sui operis, erasâ priore illa sua opinatione, veram doctrinam substituit.

Posterior modus, parum reuerà quadrat; quia cùm tres sint operis nostri vires morales, quibus videri posset, defunctos per superstites operantes iuari, nempe meritoria simpliciter dicta, impetratoria, & satisfactoria: prima non habet locum respectu aliorum, nisi in Christo. (Vis meritoria de congruo, non attenditur, quia meritum congruum neque est simpliciter dictum meritum, neque est ex certa lege:) secunda vis moralis proposita, reperitur in sola oratione, cuiusmodi non est perceptio sacramenti: Imò ipsa oratio, præcisè vt impetratoria, est tenue defunctorum subsidium; quia post transitum ex hac vita locus tantum est suffragationi per aliquam litri appensionem, non autem impetrationi gratuita. Tertia, quæ est vis satisfactoria, sequitur operis pœnalitatem, quæ in ordinario actu communionis, aut nulla est, aut perexigua. Quis enim labor est, in glutitione tantulæ hostiæ, per se loquendo? Hoc addo, quia si quis laborans angina, veller tamen percipere Eucharistiam, non absque labore; ea perceptio posset esse satis pœnalis, atque adeò non parum satisfactoria. Item communio illius Monachi, quæ memoratur in Actis S. Hugonis Cluniacensis, fuit haud dubiè multum pœnalis, & consequenter satisfactoria. Imperitiuerat S. Hugo cælesti pane quendam leprosum; Is mox à glutita sacra hostia, nauseam passus, timebatur vomitu eiekturus sacrum cibum. Accurrit Godefrannus, (id Monacho sacrificij Camillo nomen;) & subiectâ ytrâque manu ori vomentis, sacram hostiam, imitam

Vulsus ac depilatus.

inistam cum vberi purulentia, & terra illuue è leprosi stomacho profusa, excepit, & alacer resorbuit; tanto S. Hugonis horrore, vt diceret, sanctum Laurentium Craticulæ impositum, non plus persensisse Cruciatum, quàm pertulisset Monachus ille, sic cōmunicando. Talis ergò Communio, haud dubiè est pœnalis, atque adeò satisfactoria. Per se tamen loquendo, & præcisè spectando perceptionē Sacramēti Eucharistiæ, resectis antecedentibus, & comitantibus, ac subsequētib; (vt nunc facimus;) aut perparum, aut nullatenus est laboriosa: atque adeò vel admodum tenuiter satisfactoria est, vel nullatenus planè. Et tamen viator fidelis, non nisi satisfactorium operis sui boni fructum, potest in defunctum transfundere. Vix igitur, aut nullo modo, Communio *vt Communio*, potest defuncto esse fructuosa. Atque ita præstaret laboriosum aliquod opus, v.g. flagellationem, aut ieiunium, vel Eleemosinam in defuncti gratiam exequi. Vel si de Sacramentis agatur, præstaret pro defuncto confiteri Sacramentaliter, quod est admodum pœnale; vel vxorem ducere, pro defuncto, humeros honorato illi ponderi (vt Nazianzenus appellat,) ad immensas ærumnas subiiciendo. Nemo tamen hætenus, vel confessus est, vel vxorem duxit in gratiam defunctorum; nec repertus est quispiam pro mortuis adeò sollicitus, vt excitârit fideles, ad pectoris vomitum pro mortuis Sacerdoti aperiendam, vel inducendum se in tribulationem carnis, & spinas coniugio confectas, per susceptionem Sacramenti Matrimonij pro defunctis.

Hæc est summa doctrinæ Raynaudi, de Communionē pro mortuis; quos negat consolationem re-

cipere, audiendo, aliquem viuorum pro ipsis communicasse, præcisè attendendo perceptionem Corporis Domini: quia piè defuncti, norunt, quanti sit ea perceptio in gratiam ipsorum facta: præterquam quòd ob infossam gurgiti doloris voluntatem, non sunt capaces delectationis, & consolationis, suæ lætitiæ.

§. II.

*Doctrinam propositam sugillat
Thomas Hurtado.*

EXtremam particulam proximè adductam, Hurtado non secus ac Cacus caudam boum, quos in spelæum suum trahebat, validèprehendit, stomachatus non modicè, quòd negetur formalis consolatio perfundens animas purgatorij: cùm tamen sint tam fortia motiua se delectandi, animabus illis obuersantia, quæ ipse Hurtado passis eloquentiæ velis prosequitur à num. 578. ad numerum 583. Et roborat sententiam suam autoritate, ac ratione. Autoritate quidem Abulensis, quem sequuntur Elias à S. Thoma, Suarez, Bonacina, Henriquez, Grassius, atque Coninck. Ratione autem, quia in Parasceue, Sacerdos vtrunque sacrificat, communicando: Et illud suum qualecunque sacrificium in Ecclesiæ solius persona factum, applicat toti Ecclesiæ Sanctæ, atque adeò etiam animabus Purgatorij. Quidni ergo laicus, nomine amici iam defuncti percipiens Corpus Christi, possit ad amicum illum subleuandum, comedere Corpus Christi, & aliquatenus communicando sacrificare per participationem hostiæ

hostiæ antiùs immolatæ ?

Iam ut euerat rationes Raynaudi, argumentatur Hurtado, excutiens, quæ aduersarius protulit circa duplicem modum iuandi defunctos per Communionem. Et adiutorium quidem ex opere operantis astruit Hurtado à num. 593. contendens vim satisfactiuam ex operis pœnalitate oriundam, esse per magnam in actibus orandi, & amandi ex Charitate. His quippè actibus, nostra nobis subtrahimus, & Deo subiicimus : quod esse valdè pœnale, probat Hurtado ex D. Thoma in 4. d. 15. q. 1. art. 4. q. 1. ad 1. agnoscente, vim satisfactiuam, quæ est frutex pœnalitatis, cerni in subtractione commodorum Corporis, quod maximè præstant duo actus prædicti. Oratio quidem, quia affligit corpus, & omnia nostra Deo totaliter submittit : Charitas verò, quia animum roborat, indita illi fortitudine, per quam caro infirmatur ; quia dum crescit in nobis fortitudo amoris intimi, infirmatur proculdubio fortitudo carnis, ut ait S. Gregorius hom. 15. in Ezech. Spiritu ergo per charitatem roborato, (qui est Sacramenti Eucharistiæ effectus maximè singularis, diciturque idcirco *panis fortium* ;) atteritur caro, vnde pœnalitas, & virtutis satisfactiuę origo, in actu sic carnem atterente. Ergo Communio prout satisfactoria, iuuat defunctos. Accedit quòd quamuis perceptio Eucharistiæ Physicè spectata, vix sit laboriosa, atque pœnalis ; tamen moraliter loquendo, est valdè pœnalis ; quia per eam ad Deum accedimus, cuius summa Maiestas terrorem iniicit, & laborem longè maximum homuncioni infert. Nec mirum, cum columnæ cæli contremiscant in conspectu Domini ; & rustici ante Regis conspectum, summo pauore

pauore corripiantur. Itaque Eucharistiæ perceptio longè pœnaliior, ac laboriosior est, quàm susceptio Sacramenti Pœnitentiæ aut Matrimonij. Hæc esse euidencia argumenta, statuit Hurtado n. 596 & 606.

Iam quod Raynaudus, negauit Communioni, præcisè vt perceptio est, vim impetrandi, reprehenditur ab Hurtado num. 612. quia oratio est impetratoria. Atqui perceptio Eucharistiæ, reddit hominem valde aptum ad impetrandum. Igitur habet vim impetrandi omninò magnam: Et confirmat hoc, valdè neruosè, (vt ait num. 616.) quia ansa, titulus, & causa impetrandi, est meritum, & satisfactio Christi; quæ allegare, est petere in nomine Christi. Itaque, (vt subdit num. 617.) qui communicat, allegans Patri Christum, quem recipit, efficacissimè impetrat, & longè efficacius, quàm per feruentissimū actum Charitatis. Vnde si susceptionem Eucharistiæ dirigat ad impetrandum defunctis leuamen, eos potentissimè subleuabit. Nec refert, quod Raynaudus ait, extra viam nihil remitti absque solutione, quam oratio præcisè prout impetratiua non exhibet: hoc, inquam, non refert, quandoquidem reuerà potest leuatio exorari defuncto, absque satisfactione. Imò iuxta Hurtadum num. 621. non vacat temeritate, id negare, quia est sententia indubitata, quòd sancti orent pro animabus Purgatorij, & iuuent eos, qui in ipsorum templis tumultantur; Cùm tamen certum sit, sanctos sola impetratione posse iuuare defunctos: ac proinde sapit errorem, dicere, quòd animæ Purgatorij non nisi annumerata pro eis solutione iuuari possint. Nec D. Thomas hoc dixit vnquam, tametsi illi attribuitur in 4. d. 45. q. 2. art. 3. quæstiunc. 3. Sed est assumentum,

assumentum, malignè ab aliquo interpolatore attextum, atque adeò repudiandum. Quidni enim possint Sancti obtinere à diuina largitate, quod homo ab homine exorat, relaxationem scilicet debiti pœnæ, absque pretij annumeratione? Sicut ergò per Indulgentiam Pontificiam, absque satisfactione lucrantis indulgentiam, abstergitur reatus pœnæ; ita & per orationem prout impetratoriam; alioqui non possent defuncti per Indulgentiam subleuari, quod tamen est ex fide certum. Argumentum est manifestum, iuxta Hurtadum num. 628. & 630. Miratúrque admodùm potuisse homini Catholico venire in mentem, vt subsidium ab oratione prout impetratoria, & à Communione prout per orationem ordinata ad exorandam defuncto subleuationem; aut nullum, aut tenue nō nominaret: Cùm tamen sit subsidium adeò pingue, vt concludit num. 631. Non plura Hurtadus de Communione defunctis insigniter fructuosa ex opere operantis, quem fructum malè extenuabat Raynaudus.

Pergit Hurtado, ad vtilitatem mortuis prouenientem, ex opere operato Communionis, non quidem vt perceptio est, (quod nemo vnquam somniauit, & Raynaudus, qui id exagitat, finxit quem feriret, vt Hurtadus ait num. 632.) sed alia quadam ratione, quam à num. 633. vestigat: fassus tamen ingenuè num. 649. se nihil hac in parte proferre, nisi ad imitandos SS. Patres, qui inter impugnandum hæreticos, ad alterum extremum declinarunt. Sic enim exagitando Raynaudum, adeò extenuantem fructus transeuntes Communionis, tentauit ipse Hurtado, eos fructus transeuntes adeò diffundere, vt etiam ex opere operato admittantur; Inprimis quatenus Com-

munio prout est opus iniunctum, concurrit, saltem
 ut conditio ad Indulgentiam: concurrit autem ex
 opere operato, quippè independenter à statu, & san-
 ctitate lucrantis Indulgentiam, quam defuncto ap-
 plicat. Deinde subleuat quoque mortuum Commu-
 nio ex opere operato, quatenus Communio infert
 communicanti charitatem; quæ ex consequenti, &
 per quandam concomitantiam, supra effectum prin-
 cipalem Eucharistiæ, infert remissionem pœnæ. Sicut
 enim consecratio panis, supra inductionem corporis,
 factam vi verborum, inducit ex opere operato, per
 concomitantiam naturalem, etiam animâ Christi, non
 quidem vi verborum, sed ex eorum efficacia: Ita simi-
 liter perceptio Eucharistiæ, causando ex opere ope-
 rato vniõnem charitatis, debet etiam causare conco-
 mitanter effectum secundarium necessariò connexum
 cum primario, hoc est, satisfactionem pro pœna tem-
 porali, reatûsque absterisionem; quem Eucharistiæ ef-
 fectum, qui communicat, potest à se abdicare, & trans-
 fundere in defunctum, iuxta generalem doctrinam,
 de concessa cuique transcriptione propriæ satisfac-
 tionis, in alium.

Sic exagitata vniuersâ Raynaudi doctrinâ, conclu-
 dit Hurtado, *omnia Raynaudi argumenta, prorsus fri-
 uola esse*. Nam D. Thomas, quo niritur lectione 6. in
 cap. 6. Ioannis, eos dicit errare communicando pro
 mortuis, qui putant communionem eis prodesse, præ-
 cisè ut est vltus Sacramenti, siue ut est perceptio: non
 negat tamen, quin possit perceptio defunctis prodes-
 se, & ex opere operantis, prout est satisfactoria, atque
 impetratoria; Et ex opere operato, modis proximè
 expositis. Quod autem Raynaudus, silentium Theo-
 logorum causatur, non est audiendus; cum Gerſo

Vulsus ac depilatus.

II

Decanus præclarissimus, agnoscat fructum Communionis pro mortuis (utriusque in sensu per ipsum Hurtadum tradito:) suffragatur quoque pius, ac doctus Antistes Nicolaus Cabasilas, malè à Raynaudo schismatis, aut etiam hæreseos infimulatus: Purgatus autem à Gentiano Herueto, qui eum celebrat ut pius, & doctum virum; quod Raynaudus de Theodoro pro se allegato non poterit dicere; cum constet, eum schismate Græcánico fuisse inquinatum. Beatam quoque Gertrudem, & B. Ioannem à Cruce, clarum est, sterisse contra sententiam Raynaudi, qui nimis licenter de sanctarum mulierum revelationibus est locutus. Prorsus verò ridiculus est idem Raynaudus, cum ait, superstites in charorum suorum exequiis non communicare, neque alios ad communicandum conducere. Vnde enim scit, hoc non fieri? Quod si fideles non faciunt, ratio est, quia non habent Sacerdotes ad manum, ut adedè frequenter communicent. Olim autem in Missis pro defunctis, omittebatur Communio laicorum, id quod etiam pro se urget Raynaudus, sed perperam: Omittebatur enim tunc Communio, quia in Parasceue, & triduo ante Pascha, omittebatur osculum Pacis, quæ est dispositio prærequisita ad communicandum; vnde nemo per illud triduum communicabat. Per proportionem ergo, quia in Missis pro defunctis non dabatur osculum, negabatur quoque Communio. Tandem ex eo, quòd, (ut Raynaudus argumentatur,) Sacramentum Eucharistiæ sit cibus, & Pharmacum, inferri duntaxat potuit perceptionem eius, directè, & per se, soli sumentis prodesse ex opere operato; quamvis ex opere operantis, prout satisfactoria, & impetratoria; itémque ex opere operato, siue per Indulgentiam applicato,

siue effectum primarium concomitante, & abdica-
bili, possit transeunter prodesse, & defunctos suble-
uare.

Altè verò infixum hæret Hurtadi præcordiis, spi-
culum à Raynaudo infixum, & postico primæ pagi-
næ, & in operis meta, cum adhibuit in causam suam,
verba illa Innocentij III. *Falsa sunt abiicienda re-
media, quæ veris sunt periculis grauiora.* Intolera-
bile enim censet Hurtado, vocatæ perceptionem Eu-
charistiæ, falsum pro defunctis remedium; cum in-
ter externa opera sit omnium subsidiorum optimum;
ideoque (quantùm licet,) frequentandum, saltem in
vicaria Communionis realis Communionem spiritua-
li, defunctos item subleuante, ex opere operantis;
Et quidni etiam ex opere operato si sit opus iniun-
ctum, ad lucrandam Indulgentiam? vt sanè posset,
deficiente reali communionem, iniungi.

§. III.

*Iudicium de Hurtadi sugillatione; primùm qui-
dem quoad conclamationem in negatam à
Raynaudo animabus Purgatorij gaudidrum
ubertatem, & exquisitas delicias.*

VErane, an falsa sit Raynaudi doctrina §. I. addu-
cta, non moror in præsentia. Tantùm monstrare
consilium est, quàm casto nisi eam appetiuerit Hur-
tado, & quam ineptè patrocinetur Communioni
pro Mortuis, pro qua saragit. Itaque monstrabo eu-
niditatem eorum, quæ in Theophili doctrinam in-
torfit; simulque ea disiciam, quibus tentat declama-
tionem

tionem suam contra eundem stabilire. Seorsim verò, dedecora in eius scriptione micantia repræsentabo.

Aggressus ergò Hurtado §. 3. ad Raynaudi confutationem, orditur à densa grandinatione per conuitia, quibus vix posset in hæreseos assertorem, conii cere tetriora. Arripit autem primo loco ad Cacoehymix suæ profusionem, quod obiter dictum erat à Theophilo, animas Purgatorij, rescientes aliquem pro eis communicasse, non perfundi gaudio, eò quod in tanta cruciatuum immanitate, non habeat locum læritia. Conclamat Hurtado in hanc assertionem, allegato Abulense, & vno, aut altero recentiore, qui dicunt, animas Purgatorij perfundi magnis consolationibus, & grandes, ac vberes delicias persentire.

Sed inprimis, hoc est, saltare extra chorum, quod huic scriptori perpetuum est. Quærimus enim, an per Communionem pro mortuis, abstergetur reatus eorum; non autem, an defuncti fideles mulceantur maximis consolationibus, cum audiunt, superstites communicare pro illis; Id enim est alterius loci, in quem idcirco ablegatum est à Raynaudo. Deinde illa consolationum vbertas in tam atroci Viuicomburio per Hurtadum ostentata, ægrè cohæret cum animarum illarum miserrimo statu, & acerbissimis cruciatibus, quos certum est (recisa æternitate, & excipientium rabie) plerumque superare immanitate, Cruciatu Inferni damnatorum. Norunt quidem piæ illæ animæ, spem bonam sibi esse repositam, & finem denique fore suis cruciatibus: Et quia norunt, se iuste plecti, boni Patris iram, cum patientia, & æquanimi-
tate excipiunt. Tamen sentiunt cruciatuum suorum acerbicatem, & tantis tormentis subiacent, vt attenta
infossione

inossione voluntatis in abyssum doloris, nullam actum delectationem percipiant, ex variis illis moriuis consolationis, quæ intellectui ipsarum obuersantur. Sicut damnati, quamuis possent pro eis quoque, excogitari aliqua moriua lætitiæ, tamen re ipsa nullo gaudij sensu perfunduntur, ob indiuisiōem dolorum Domini, vt exponit S. Gregorius 15. Moral. cap. 21. hauriunt enim perpetuò calicem vini meri, & præoccupatam habentes tanta doloris acerbitate voluntatem, nullius planè gaudij sunt capaces, vt rectè philosophatur Guil. Parisiensis 3. 2. de vniuerso c. 4. adducto exemplo eius, cui intra incensissimam fornacem iacenti, humana solatiola frustra proponerentur; nihil enim idcirco remitteretur de summo dolore, nec vllus lætitiæ sensus ei obtingeret. Idem ergo contingit damnatis iuxta Gulielmum. Et eodem modo philosophatur Vasquez 1. p. d. 242. n. 7. & 8. reiectis Ochamo, & Gabriele, (quibus subscribit Molina 1. p. q. 64. a. 3.) asserentibus, causam perpetuæ damnatorum tristitiæ, nullo vnquam gaudio dilutæ, referendam esse in violentam subductionem diuini concursus, necessarij ad eliciendum actum gaudij. Sed nihil attinet, tale miraculum inuehere, cum ex natura rei ad excludendum quemcūque sensum lætitiæ, satis superque sit abyssus doloris præoccupans voluntatem; in quam proinde immissa suauitatis gutta, amarorem potius contraheret. quàm aliquid suæ dulcedinis subiecto sic malè affecto imperitiret. Ratio porro assignata omnimodæ huius exclusionis gaudij, æquè vrget circa animas Purgatorij ac circa damnatos, & dæmones. Quæ verò pro deliciis magnis animarum Purgatorij adducit Hurtado, sunt planè inania; & ad summum probant, superpetere

petere piis animabus motiua, è quibus progerminaret formale gaudium, si subiectum esset expeditum ad gaudij receptionem. Aliàs, dicuntur animæ Purgatorij abundare consolationibus, non quòd habeant dulcem sensum, à quo tristitia imminuatur; (quæ essent consolationes noxiæ, & diutius remoraturæ animas procul à cælo) sed quod muniantur scuto cordis, id est, æquanimirate, & subiectione voluntatis ad sedatè ferendum ultorem Deum; quod vnum voluit Suarez, malè intellectus ab Hurtado. Qui item ridiculè, in animabus Purgatorij distinguit intellectum superiorem ab inferiori, & voluntatem superiorem ab inferiori; & animas Purgatorij, ait præoccupari à doloribus secundum solum intellectum, & voluntatem inferiorem; quamuis intellectus, & voluntas superior in eis non præoccupetur, alioqui non possent amare Deum, nec sperare beatitudinem. Aina Sed cogitare te oportuerat, intellectum inferiorem, alium non esse, quàm Phantasiam; & voluntatem inferiorem aliud non esse, quàm appetitum sensitivum; quæ inferiores potentix, in nobis ostreo carnis conclusis, habent locum, non autem in animabus separatis, atque dæmonibus. Item cogitandum tibi fuerat, amorem, ac spem, benè coherere cum voluntate doloribus acerbissimis præoccupata; non item lætitiā, & gaudium. Itaque hæsit hîc aqua, Hurtado.

Reponit tamen argumentum, quod ait esse manifestum. Probat ergò, cum quis pro mortuo communicat, eū, si id resciat, (vt facile rescire potest,) omnibus lætitiis incedere. Nam Sacerdos in Parasceue sacrificat ex præsanctificatis; & illud sacrificium nomine publico offert Deo, ad utilitatem totius Ecclesiæ

suæ sanctæ ; atque adeò etiam animarum Purgatorij, in quo aliquali sacrificio, nihil re ipsa est præter communionem. Quidni ergò , si laicus similiter nomine suo communicet pro animabus Purgatorij, maximum eis solatium, & consolationem impendat? Vt aliquid ad rem faciens dicatur hîc ab Hurtado , oportet *solatium* sumere pro delectatione, & lætitia. Hic autem actus, cur non possit à communicante conciliari animabus Purgatorij, iam dictum est; nec ab Hurtado (vt promiserat) est manifestè monstratum Similitudinaria verò illa sacrificatio diei Parasceues, sine iudicio in hanc rem adducitur , quia quod ibi appellatur *sacrificium* , non est communio : sed ritus sacer specie externâ aliquatenus consimilis vero sacrificio, cuius idcirco nomen retinet. Vt apud Ethnicos in sacris, deficientibus veris, simulata ad memoriam & solatium aliquod adhibebantur. Apud nos quoque sacrum similitudinarium , nec nisi aliquatenus specie externa idem veri retinet appellationem vt videre est in Missa nautica, & vt aliqui vocant, *sicca* , cuius olim vsus erat in longis nauigationibus , priusquàm in flustro auderent sacrificare.

§. IV.

De Raynaudi per Hurtadum criminatione, ob negatum, vel extenuatum Communionis pro Mortuis fructum ex opere operantis, quatenus satisfactiuo.

Sic præstructo sibi aditu adhuius negotij penetralia, contundendum suscipit Hurtado Ray nau-

dum, ob negatam, vel extenuatam, vim satisfactiuam perceptionis Corporis Christi, siue Communionis. Adhibet autem rationem, quam recisâ loquacis huius Fabij verbosatione, in hæc pauca contraho. Pœnalitas operis est radix virtutis satisfactiuæ applicabilis defuncto: Atqui in Actu orationis, & amoris perfecti, siue charitatis, est maxima pœnalitas, quandoquidem per orationem submittimus omnia nostra Deo: Per charitatem autem, anima roboratur, vnde iuxta D. Gregorium sequitur corporis afflictio. Igitur perceptio Eucharistiæ, est maximè pœnalis, atque adeò maximè satisfactoria; & proinde potest applicari defunctis. Ita Hurtado num. 596. & 597. ostentans hanc argumentationem vt euidentem.

Possim fanè hac ratiocinandi tarditate considerata, illud ipsum Hurtado occinere, quod ipse n. 598 in Theophilum ex Nazianzeni codice, qui apud ipsum solum legitur, cachinnando intorsit; dicens, eum, dum citat equum, incitare debere iuxta Nyssam, hoc est, (inquit) à scopo aberrare non debuisse; quod an eo loco fecerit Theophilus, infra dicam. Hurtado autem, apertissimè id præstitit hoc loco. Cum enim agamus de solo opere perceptionis Eucharistiæ, an sit pœnale, & satisfactorium; ipse obtrudit actum orationis, & amoris, quos ait esse maximè pœnales. O bone, quò te pedes? Vbi tuum iudicium? an iidem actus tibi sunt, perceptio Eucharistiæ, & oratio, vel actus charitatis? Quorsum igitur, vt probes perceptionem Eucharistiæ esse, (vt tu vis) actum maximè pœnalem, adducis actum orandi, & amandi? hoc Latine vocatur, probare quidlibet, per quodlibet, Et cum nihil ad rem dicas, iactare, te rem sole clarius patefecisse. Dices, te hos actus proferre, quia pœ-

rúmque antecedunt Communionem vel ei comitantur: Sed hoc si dicas, saltabis nihilominus extra chorum, quia non est quæstio de actibus Communionem antecedentibus, aut comitantibus, sed de sola Eucharistiæ perceptione. Alioqui si inter communicandum validè humeros contunderes admoto flagello; aut caro tua horrido cilicio applicito liueret, æquè posses argumentari, & probare, quòd perceptio Eucharistiæ sit actus valdè pœnalis, ratione flagellationis eam comitantis, aut admotionis cilicij; qui tamen sunt actus valdè per accidens adiuncti Communioni, siue perceptioni Eucharistiæ. Per Mastrucam tuam, Hurtade, auderésne sic argumentari in rem propositam? Et tamen eo planè reuoluitur argumentatio tua, iuxta responsum hoc, si illud astruas, tuúmque esse velis,

Verùm condonemus Hurtado, hanc argumentandi ruditatem. Videamus, an pœnalitas in actu orandi, & amandi, tanta sit, quantam ipse comminiscitur. Oratio (inquit) submittit nos totos Deo; Amor autem roborat animam. Ergò sunt actus maximè pœnales. Hoc sanè est, non incitare equum iuxta Nysam, sed vagari extra stadium, & fabrum cadere, cum ferias fullonem, ex antiquo apud Arnobium adagio. Quid enim orationi, & submissioni nostræ ad Deum, formaliter, & præcisè loquendo, vt non facimus? An refingenda erunt omnia Dictionaria, vt Hurtadus habeat nouas vocum notiones, ex quibus in rem suam compingat argumenta? In omnibus hætenus vocabulariis, nomen *Orationis* significat *petitionem*. Vnde ergò habet Hurtado, quòd denoret *submissionem*? *Submissio* enim non est petitio, formaliter, ac directè loquendo; (vt Theologum rude donatum lo-

qui

qui decet:) sed est actus humilitatis, quæ longè alia virtus est, quàm Religio, ad quam pertinet oratio. Et quamvis in actu exercito, cernatur in orante, ac petente submissio, quâ se proficetur mendicum, iuxta S. Augustini doctrinam; tamen neque ea submissio, neque ea petitio, actus sunt adeò pœnales, nisi si diù continuentur, & magna cum contentione animi exerceantur. Per se autem loquendo, oratio potius infert gaudium, quàm laborem, iuxta illud Iacobi. *Tristatur quis in verbis? orat.*

Amor item perfectæ charitatis, tantùm abest, ut sit adeò ærumnosus, ac fingit Hurtado, ut potius sit dulcissimus, ut S. Bernardus sæpè sæpiùs affirmat: Et inde patet, quòd amanti nihil est difficile. Urget Hurtado; sed Amor roborat animam; ergò affligit corpus. Hæc consequentia est Hurtado digna; nam per se loquendo, quod roborat animam, corpori quoque vegetando est accommodatum: sicut è contrario, quod animam atterit, corpus item debilitat, iuxta illud. *Animus gaudens* (quod maximè præstat amor) *etatem floridam facit; Spiritus tristis exsiccat ossa.* Absurdè igitur, ex roboratione animi per actum charitatis, infertur eius pœnalitas. Verum est, charitatem sæpè insilire in ardua, & indicare actus, aut perpeffiones perdifficiles, ut egregiè expendit Theodoretus orat. de charitate, qua conclusit religiosam historiam: sed hoc non est, charitatem esse formaliter pœnalem; sed ad summum, causaliter, quod nihil refert ad institutum. Igitur vniuersa Hurtadi substructio, pessimè materiata est, & vndecunque rimas agit.

Firmat laborantem ratiocinationem suam Hurtado, quia per charitatis actum, ad Deum accedimus; quod tamen Physicè non est laboriosum, moraliter

tamen est valdè pœnale, attentâ tantâ dignitate, ad quam columnæ cœli contremiscunt: quantò magis homuncio, quid Deum expanescit? (ait Hurtadus impingens colaphum Prisciano, & verbum neutrum vsurpans tanquam actiuum:) sed condonando ei hanc sribiliginem Grammaticalem, ridiculè cespitat in negotio Theologico, confundens actum charitatis cum timore reuerentiali, retrocedente præ sancto pauore; Cum è contrario charitas accedat, & stringat Deum quàm suauissimè. Neque tamen pavor ille, (qui actus est humilitatis præclarè expositus à Scoto in 3.d.34. q.vnica, & ibidem Richardo art.2 q.4.) tam pœnalis est, vt sibi fingit Hurtado.

Et vt eius comparationes non prætermittantur, perspicuum est, eum sanctum recessum non esse adeò ærumnosum, ac laboriosum, quàm est accessus ad coniugium, quo innumeræ cruces inferuntur, v ple- nè persecutus est contra Iouinianum S. Hieronymus, & ex eo, aliisque planè multis Raynaudus in opere de martyrio. Neque item pavor ille tanto labore homi- nem onerat, quantò resectio conscientie in Sacra- mento Pœnitentie, in quo sæpè, pudenda, & puten- tia sunt aperienda: Quidquid de his comparationi- bus gratis in contrarium statuatur Hurtado, quia ne- que tribulationem carnis coniugio adhærentem, (quantùm arbitror) est expertus; neque admisit vn- quam, pro quibus confessario aperiendis suffundi in- genti rubore, necesse haberet. Sed non omnibus idem datum est. Itaque labor eorum, superat haud dubiè laborem pavoris, præ humilitate à Dei maiestate re- cedentis; ac proinde possent isti confiteri de pecca- tis, & matrimonium contrahere in gratiam defun- ctorum, multò magis, quàm Eucharistiam percipere.

Quod

Quod autem Hurtado, inter instituendas hasce comparationes laboris, & fructus satisfactorij consequentis pœnalitatem Communionis, ait, hoc esse omnium maximum, ac præstantissimum defunctorum subsidium, renoco illi in memoriam, hoc esse contra fidem, cum Synodus Tridentina apertè doceat, id esse tribuendum sacrificio, non Sacramenti perceptioni.

Penè exciderat potens illud Hurtadi argumentum non iam pro labore orationis, & amoris; sed pro ipsiusmet Communionis summa pœnalitate, inde ductum, quòd ex doctrina Patrum, & Conciliorum, perceptio Eucharistiæ fomitem nobis innatùm restinguit, & toram natiuitatis nostræ à Gehenna inflammata refrigerat, atque adeò maximè affligit corpus. Ita ille num. 599. crassè admodum imaginatus, restinctionem, vel potius nonnullam mitigationem fomitis, fieri per immissionem frigoris. Quod si ita esset, B. Virgo, quæ fomitem habuit supra omnes puros homines restinctum, temperiem habuisset frigidissimam, & à connaturali hominibus dispositione, valdè dissentaneam. Restinctio itaque fomitis in communicantibus, id est, reusio, ac hebetatio aliqua telorum, quæis caro spiritum impeteret, non fit per afflictiuam corporis distemperiem à Sacramento illatam; sed per subministrationem auxiliorum accommodatorum, ac benedictionum dulcedinis, quibus caro desipit, & quæ ad eam in damnum spiritus vegetandam facerent, amarescunt, vnde remissio lasciuix. Itémque oritur ex occasionum remotione, per extrinsecam prouidentiam, tela nequissimi ignea auertentem. Quibus sanctimonix corporeæ subsidiis, ita munitur per communionem pia anima, vt idcirco corpus non atteratur, sed potius exulter in Deum

viuum. Possem hic imitatione Hurtadi, passis velis excurrere, quia de multis paginis fæno, aut paleâ implendis, & benè saginando volumine, est admodum sollicitus. Ego hæc pauca libasse summis digitis contentus; porro pergo ad reliquas hominis exertationes, spectantes impetrationem.

§. V.

Discussa Raynaudi per Hurtadum exagitatio, ob sublatum, vel imminutum fructum Communionis pro Mortuis, ex opere operantis impetratorio.

STomachatur Hurtadus in Raynaudum, negantem Eucharistiæ perceptionem, prout præcisè perceptio est, impetratoriam esse. Imò verò (inquit, & esse *neruosum argumentum* admonet,) perceptio illa, ut sic est maximè impetratoria. Redit enim hominem valdè idoneum ad impetrandum, eo ipso quod homo communicans allegat Christum, & merita eius, quod nihil est ad impetrandum efficacius. Pax tecum, Hurtade; hoc non est ratiocinari, sed rudere. Nam si quod reddit hominem aptum ad impetrandum, pollet vi impetratiua, ergo Baptismus, & quoduis aliud Sacramentum, eâ vi præditum est, cùm conferat gratiam sanctificantem, maximè opportunam ad impetrandum. Absurdè verò dicitur, hominem communicantem, præcisè prout percipientem Corpus Christi, allegare Christum, & eius merita: sed homo communicans, præcisè ut communicans, sumit intra se Christum, & consequenter effectui meritorum eius participat,

participat, quod longè aliud est, quàm petendo impetratore, vel vi impetratoriâ pellere. En igitur quàm ad rem, & quàm solidè argumentatur Hurtado, cùm *argumentatur nervosè*. Cæterùm quod ait, hanc impetrationem per allegationem Christi, plus subleuare animas Purgatorij, quàm feruentissimum actum charitatis; pugnat cum iis, quæ asserit, extollens actum charitatis super omnia planè subsidia Mortuis per superstites subministrabilia; nimirum homo summus, & Rhetoricator maximus, quidquid attingit, pro summo, & grandissimo habet: vt ille apud Senecam Senecio. Nec illud omittendum, notari grauius ab Hurtado Raynaudum, negantem defunctos admodum subleuari per nudam impetrationem, seclusâ pœnalitate, & vi satisfactiua pœnalitatem consequente. Hoc explodit Hurtado, quia Indulgentiæ non sunt satisfactiue, & tamen defunctis applicatæ, abstergunt eorum reatum. Sed hæc argumentatio, supinitatem arguentis manifestam facit: Nam dicere, Indulgentias carere satisfactione, est laborare ignorance terminorum; Cùm nihil aliud sit Indulgentia, quàm annumeratio pretij pro temporali reatu debiti; collatis in eam rem Christi, & sanctorum satisfactionibus, vt Clemens V I. definit in Extrau. *Vnigenitus* de Pœnit. & remission. Quòd autem nuda impetratio extergat defunctorum reatum, inuersissimile est, cùm extra viam positis, nulla amplius fiat gratuita remissio. Quod si sancti orant pro defunctis, vt habet Ecclesiæ sensus; non tamen subleuant defunctos per nudam impetrationem remissionis debitæ pœnæ; sed vel orando Deum, vt dignetur illis applicare partem aliquam satisfactionum Christi & Sanctorum in Ecclesiæ gazophilacio asseruatam; vel petendo

petendo, ut dignetur excitare fideles ad dignè pro defunctis satisfaciendum. Sic deiectis omnibus Hurtadi machinis, liquere videtur, fructum Communionis ex opere operantis, quem ipse adeò pinguem esse contendit, admodum reuerà tenuem esse, nec nisi contententis obesitatem redolere.

Ad tam infelicem earundem machinarum collisionem emotus, & quadrupedante sonitu putrem quatiens campum Hurtadus, non absque nonnullius ferociæ sensu, exclamat. Quid? An non possum, Actum perceptionis Corporis Christi à me prodeuntem, dirigere ad animas Purgatorij, volens eum actum meum, sin minùs ut satisfactorium ob tenuem pœnalitatem; at saltem ut impetratorium ad illarum subleuationem ordinari? Quis hoc dicat verum non esse, *nisi subuentanea dicat?* Phrasis est Hurtadiana ex fragrantibus areolis lectissimæ latinitatis eius, decerpta, qua dictum incongruum cum ouo sterili componitur, per valdè concinnam metaphoram: sed erit, qui illud Augustini reponat, *Nulla modo sonat disertè, quod dicitur ineptè.* At ineptissimum est, cum quis subuentaneis conferre assertionem, præsertim verissimam; qua negatur, opus ex satisfactiæ virtutis vacuum, posse pro libito operantis dirigi ad satisfaciendum pro mortuis: vel actum tenuissime satisfactorium, eo ipso quòd ordinatur ad eximiè satisfaciendum pro illis, euadere insigniter satisfactorium, ita ut possit ostentari pro maximo, quod habeamus ad mortuos subleuandos subsidio. Hoc ridiculum planè est; Directio enim operantis debet supponere intrinsecam operis aptitudinem, & proportionem cum tali fine, alioqui erit absurda directio, & fructus vacua. Habemus exempla similia in iis, qui ad Dei honorem,

honorem, aut ad sanctorum gloriam, perpotant; vel qui vouent ad Dei honorem, interesse vano spectaculo, puta, agitationis taurorum; aut qui ad Dei honorem vouent ire in agrum, etiamsi ea profectio ex se indifferens, nullo conuestiatur medio ad Dei honorem commodante. Tunc enim ordinatio operis illius ad Dei gloriam, inepra est, nec honestatem religionis operi conciliat, sed illud exsuccum relinquit, ac euanidum, quale erat ante ordinationem, vel directionem, vt rectè argumentatur Suarez l. 2. de voto c. 4. n. 7. Idem ergo contingit in re præsentì, in qua Hurtado subuentanea dicit, cum opus ex se non satisfactorium, vel tenuissimè satisfactorium vendit pro summo defunctorum subsidio, tantum quia à communicante dirigitur in eum finem subleuationis animarum.

Sed vt sistamus in opere prout impetratorio, de quo nunc agimus, æquè ineptit Hurtado, cum actum, qui non est oratio, vendit pro maximè impetratorio, tantum quia operans vult eum actum esse impetratorium. Esto, actus ipse referendi tale opus ad obtinendum illum finem videatur habere rationem petitionis; tamen non modò actus referens perceptionem ad talem finem, differt à perceptione ipsa, de qua sola erat quæstio; (quo ipso sumus extra controuersiam:) sed etiam perceptio, prout substantiatur illi ordinationi, per parum potest defunctos inuare; vnde D. Thomas lect. illâ sextâ, communionem (etiam prout huic ordinationi substantem) habuit pro erronea, id est, inutili mortuis, quoad abstersionem reatus. Et meritò, nam si quid esset in ea perceptione accommodatum vsui defunctorum ad abstergendum reatum, manare deberet ab actu illo ordinare; (quia de ipsis

actus ordinati aut nulla, aut pertenui utilitate iam liquet.) At actus ille ordinans perceptionem ad mortuos, neque eis multum conferre potest, ut satisfactorius, neque ut impetratorius. Non ut satisfactorius, quia vix est in eo pœnalitas aliqua. Non ut impetratorius, quia quod attinet ad remissionem pœnæ debitæ, impetratio nuda non iuuat defunctos. Nimirum ex quo puteus vrsit supra aliquem os suum, non est amplius locus petitioni pro relaxatione reatus, quo grauatur, nisi petitio simul sit pœnalis, ut fieret, si esset proluxa petitio, vel facta cum magna animi contentione, quod per se loquendo non cernitur in illa ordinatione perceptionis Eucharistiæ: quamuis petitio, quasi per anfractus possit iuuare mortuos, v.g. impetrando, ut annumeretur pro eis litrum idoneum ex Christi, aut Sanctorum satisfactionibus, vel ut Deus excitet aliquos, qui per opera pœnalia reatum defunctorum extergant, quandoquidem pro reatu mortui nihil impetratur, nisi soluendo. Quæcunque ergo generosissimus Hurtadus, pro fructu transeunte Communionis ex opere operantis, tanto cum bombo ostentabat, conciderunt, ut manifestè inania; Possemusque casum munimentorum Raynaudi, tubâ veritatis insonante (sic de se modestè loquitur Hurtado,) ineluctabiliter disiectorum; contritis validitate rationum, machinis eius omnibus, insultando in faciem ei regerere, adhibito

Prosperi in Collatorem celeumate.

*Vides Hiericuntinos muros tuos,
ad Sacerdotalium tubarum
ruisse concentum?*

§. VI.

De eodem fructu Communionis pro Mortuis ex opere operato, siue Sacramenti, communiter exploso, siue alio, recens, ac primùm ex ingenio per Hurtadum fabrefacto.

PErgo ad subuentionem defunctorum per Communionis effectum ex opere operato causatum; non quidem illum, quem Raynaudus in suo libello suscepit ex instituto eliminandum; incidenter tantùm de subuentione ex opere operantis locutus: Eum enim propriè dictum fructum Mortuis ex opere operato Communionis applicatum; Hurtado vltro dat esse subuentaneum, atque commentitium. Excogitauit tamen alium fructum Communionis, defunctis ex opere operato proficuum, qui cùm hætenùs nemini in mentem venerit, iure Nouitijs audiet, nec sua se annositate commendabit. Cedo enim vel vnum antiquum, imò etiam vel vnum recentiorum Theologum, qui aliter Sacramenti opus operatum exposuerit, quàm per opus Christi meritis perfusum, & ex Christi institutione independentem à ministri sanctitate fructuosum, si desit obex? Sed audiamus nascentem è montibus parturientibus ridiculum murem.

Ait ergò Hurtado, perceptionem Eucharistiæ iuuare defunctos ex opere operato, quia est conditio ad lucrationem Indulgentiæ, atque adeò concurrit ex iustitia, proindeque ex opere operato. Item (vt ait num 64 2. ex D. Thoma, quem exscribit) Sacramentum remittit reatum secundùm modum deuotionis, & feruoris, qui est in recipiente. Ergo, remittit ex

opere operato, non tantum communicanti, sed etiam aliis, in quos communicans eum fructum abdicabilem transfusum voluerit, etiamsi sit, collatus per concomitantiam ad collationem primarij effectus Sacramenti, atque adeò ex opere Sacramenti operato.

Hic rursus Hurtado de more saltat extra chorum, & pro solemnì sibi prerogatiua, quidlibet infert ex quolibet. Cum enim agamus de fructu ex perceptione Corporis Christi, quorsum intrudit Indulgentiam? At ô bone; num omnis, qui communicat, consequitur Indulgentiam, præsertim mortuis applicabilem? Sed (inquit) Bulla Cruciata est pro omnibus. Iterum dico. O bone; num tuis duntaxat Iberis eam Bullam ad manum habentibus, scribis? An putas nullos esse alios fideles ad sacram mensam accedentes, quam qui trans Pyreneos degunt? Gallia orbis oculus, Anglia, Germania, Polonia, Lithuania, & maior pars Italiæ, quæ sit Bulla Cruciata, vix de nomine norunt; tantum abest, ut ex eius facultate, Indulgentias defunctis applicabiles communicando consequantur. Itaque in magna orbis parte Indulgentiæ defunctis applicabiles vix sunt ad manum, nisi beneficio icuncularum anearum, aliorumve huiusmodi pietatis instrumentorum Pontificia benedictione initiatorum; quibus omninò multi fideles destituuntur. Quomodo ergo communio illorum, iuuabit defunctos ex opere operato? Itaque prorsus extra rem Hurtado, poscenti trullam, porrigit cæmentum; & pro Sacramenti perceptione, de qua quæritur, adducit Indulgentiam, quæ non nisi per accidens perceptioni illi adiungitur, & frequentissimè non adiungitur. In toto itaque hoc puncto, Hurtadus manifestè est magnus Nugipolyloquides.

Quoad alteram vero viam exponendi opus operatum perceptionis Sacramenti ad mortuos transfusibile; inprimis ridiculè Hurtado pro nouo suo opere operato adducit S. Thomam, qui manifestè agit de absterfione reatus ex opere operantis, cùm dicat eam reatus absterfionem, causari pro cuiusque fernore, & deuotione; qui modus loquendi præfert opus operantis, non autem opus operatum. Et cùm D. Thomas agat de absterfione reatus ipsiusmet communicantis, Hurtado S. Thomam pro se adducit, tanquam egisset de reatu defuncti. Sed hoc demus Hurtado, sæpè vocanti ea, quæ non sunt, tanquam ea quæ sunt. Explodendum verò est, quod ex suo cerebro nouam quandam concomitantiam inducit, quæ ex opere operato tollatur reatus pænæ; ita vt, sicut non vi verborum, sed ex efficacia eorum, anima Christi ponitur cum corpore; ita ob collatam ex opere operato vnionem ad Deum per charitatem, extergatur concomitanter ex opere item operato, per Communionem, reatus pænæ: Hæc, inquam, noua concomitantia reicienda est; Animam enim poni simul cum corpore, non per efficaciam vrborum ridiculè distinctam à vi verborum, sed ob naturalem connexionem, mirum non est; quia corpus viuum, quale est in Eucharistia Corpus Christi, non potest esse absque anima: Sed absterfionem reatus similiter connecti cum vnione per charitatem, Hurtado non probat. Vnio enim habitualis, quæ sola ritè communicanti confertur necessariò, non est siue connaturaliter, siue ex quacunque necessitate, connexa cum deterfione reatus aut totali, aut partiali; cum possit quis gratiam, atque adeò etiam charitatem habitualement comparare, vel augere, absque absterfione quacunque temporarij reatus

pœnæ. Vnde enim habetur ea connexio? Sanè cùm Christus sacrificium nouæ legis instituisset, collata ei vi ad abstersionem reatus temporalis, non fuit, cur Sacramento eandem vim adiungeret. Itaque tamen si Communio confert gratiam sanctificantem, & charitatē habitualem, reatum tamen temporalem non abstergit, quā est vsus Sacramenti. Neque hic effectus Sacramento Eucharistiæ à Conciliis, aut Patribus, vel à Theologis attribuitur, sed tantum sacrificio. Itaque figmentum nouæ concomitantiaë Hurtadianæ, omnibus retrò Theologis inauditæ, abit infumū.

Sed gratis demus, collationi vnionis habitualis cùm Deo per Communionem factæ, adiungi concomitanter remissionem reatus: Negandum tamen est, eam remissionem ex opere operato factam, subesse communicantis dispositioni, ita vt possit eam remissionem à se abdicare, & in alium pro sua voluntate transfundere. Nam ille effectus, si reuerà confertur, prodit à perceptione Corporis Christi, prout est opus ipsius Christi, non autem prout est opus hominis communicantis.

Dico esse opus ipsius Christi, quia ex Christi institutione assumetur ad certi effectus causationem: non quoddam physicè ab homine non prodeat, sed quoddam perinde moraliter se habeat, ac si esset ipsius Christi operatio: sicut gratia præueniens, quamuis physicè sit actus hominis, tamen moraliter tribuitur Deo, diciturque fieri in nobis sine nobis. Sicut ergò actio illa, quæ propterea dicitur opus operatum, quatenus concilians gratiam, non subest hominis dispositioni, sed independenter ab eius conditione, & voluntate, exerit vim suam, quoad primarium bonum communicanti collatum: ita etiam quoad accessorium,

rium, hoc est, quoad reatus temporarij deterfionem, si admittatur, tam per Sacramentum conferri. Vnde homo non est eius dominus, nec potest de ea disponere in alterius bonum. In quo est disparitas inter actum satisfactionis ex opere operantis elicitedum, de quo homo operans potest in alterius commodum disponere quoad vim satisfactiuam, quia hoc opus non est moraliter opus Christi, sed hominis diuinitus adiuti. Secus verò res habet in opere operato.

Verum non fuit, cur sollicitè insisterem dissiuenda huic molitioni Hurtadianæ, ad inuehendam nouam concomitantiam causatiuam deterfionis debiti pœnæ ex opere operato; cum ipsemet primus huius inuenti faber, vltro fateatur, hoc totum incertum esse, & se imitatione Patrum hæreses impugnantium, vltro ad alterum extremum procurrare hac in parte. Et poterat æquè dicere imitari, se afotos de quibus scriptum est, dum vitant stulti vitia, in contraria currunt.

§. VII.

De Raynaudi per Hurtadum exarmatione prorsus omni autoritate, & è contrario de ostentatis ab Hurtado pro sua sententia autoritatibus.

SVpposita infractione omnium Raynaudi rationum, si Hurtado credimus, considerandum restat, quantum sit eidem Raynaudo præsidium ab autoritate. Nam quamuis in benè ordinata disputatione, rationi ianuam aperiat autoritas, iuxta D. Augustinum: tamen quia Hurtadus aliunde occepit, non po-

tuit in hac Hurtadi infecutione, inde fieri initium.

Exarmat ergò Hurtadus Raynaudum omni suffragio autoritatis, & præsertim D. Thomæ, quo Raynaudus maximè nititur, cùm S. Doctor lect. 6. in c. 6. Ioannis expressè dicat, laicos pro Mortuis communicantes errare. Hoc Hurtado num. 575. vno verbo extricat, dicens, S. Thomam agere de communione moraliter facta per alium; sicut herus facit Eleemosynam per seruum, cui committit pecunias erogandas. Eo enim sensu Eucharistia percepta iuuat solum fumentem, quia nemo nomine alterius communicat, sicut nemo nomine alterius manducat: quamuis perceptio Eucharistiæ, prout est propria communicantis actio, possit esse mortuo utilis. Quia tamen ipse Hurtado vacillante memoria (vt infra notabo,) alibi dicit, aliquem posse nomine alterius manducare, & communicare, propterea expeditior est alia euasio, quam adhibet num. 631. Dicens S. Thomam agere de fructu Communionis ex opere operato vi Sacramenti, non autem de fructu communionis ex opere operantis, quem ibi disertis verbis admittit, quatenus ait, communionem ex intentione communicantis posse ordinari ad alium ei que communicari.

Verùm habemus in primis ex hoc D. Thomæ testimonio, non imbelle telum, quo Hurtadus saucietur. Nam num. 632. asserit, neminem vnquam somniasse quòd communio transeunter profit ex opere operato; Et Raynaudum hoc impugnantem, ait confinxisse sibi, quem feriret. Tenemus ergò Hurtadum in calumnia manifesta: quandoquidem nunc agnoscit S. Thomam damnare erroris aliquos sic arbitratos, & ex eo erroneo sensu, communicantes pro mortuis. Sed hac immemoria mentientis dimissa; falsum est

S. Thomam

S. Thomam non nisi de effectu Communionis ex opere operato agere; absolute enim, ac simpliciter dicit, errare laicos pro Mortuis communicantes, ut tunc ferebat anomala aliquorum pietas nuper refossa. Neque enim simpliciter, & absolute dicendi essent errare laici pro mortuis communicantes, si Communio ex opere operantis alios extra percipientem iuare posset notabiliter, & is fructus sub aliquam æstimationem ordinariè caderet: Etsi quæ ut minimum diminuta S. Thomæ doctrina, quandoquidem reticuisse ram vberes, tamque excellentes fructus Communionis ex opere operantis, quos in eo opere deprehendit Hurtadus. Iudicium item S. Thomæ inurentis notam erroris laicis, qui pro Mortuis communicant, esset valdè iniuriosum, & laicis, & animabus Purgatorii; quandoquidem perceptio Sacramenti potest tantoperè defunctos iuare ex opere operantis; quod D. Thomas non considerasset; ac proinde negari non posset, quin valdè temerè, & iniuriosè de ea laicorum Communionem pronuntiasset. At ne putetur, non venisse D. Thomæ in mentem, directio, & ordinatio operis Communionis ad finem subleuandi defunctos; obstat, quodd expressè facit eius mentionem, admittens posse fieri, ut aliquis communionem suam veliet alteri communicatam; & tamen ne sic quidem proficere alteri communionem, faltem ita ut fructus aliquo loco esse debeat, & haberi tanquam alicuius momenti. Ex quo paterè, ait, errare laicos, qui pro Mortuis communicant. Quid clariùs, ut appareat S. Doctorem, proposito à Raynando doctrinæ esse astipulatum? Nam iisdem conceptionis verbis utitur, quæ Raynaudus adhibuit, & explicatissimè agnoscit, errare fideles pro Mortuis communicantes, quod vnum

dixit Raynaudus. Manifestissimè eandem doctrinam tradit S.D. 3. p. q. 79. art. 7. indistinctè, & absolute docens, communionem soli communicanti prodesse. Itaque omnis illa cacochymia, & illuuius conuictiorum, sannarum, cachinnationum, admirationum tanquam ad monstrosam, & maximè insolitam doctrinam; omne, inquam, hoc oletum, quo Hurtado abundè caput Theophili perfudit, æquè in S. Thomæ caput demittitur, cùm eadem vtriùsque sint verba, & eadem omninò sententia.

Adhibuerat prætercà pro se Theophilus auctoritatem veteris Ecclesiæ, quæ tantùm abest, vt eximios Communionis pro Mortuis fructus agnouerit, vt potius in Missa pro defunctis, laicos sacro cibo non impertiuerit. Exarmatum hoc telo Raynaudum censuit Hurtado, si diceret, in Parasceue, & in triduo Mortis Christi, negatam fuisse Communionem laicis, quia cessabat osculum pacis, quæ est conditio necessariò pæmittenda communioni. Similiter ergò in Missis defunctorum negabatur communio ob non datum osculum, sine quo præuiò, non potest præberi communio. Hæc tamen ratiocinatio labat vndecunque. Nam & falsum est in triduo, hebdomadæ magnæ postremo, cessare communionem; cùm licitum sit communicare illo triduo. Quod autem Canones docent de non celebrandis in Parasceue Sacramentis, verum est de sacrificio feria 6. in Parasceue, non obeundo; qua ratione vsurpatur nomen *Sacramentorum*, in opere S. Ambrosij de Sacramentis, id est, de Missæ sacrificio. Et in Sacramento S. Gregorij, quod item est de ordine Missarum. Vsurpatio autem Sacramentorum pæfessè sumptorum, non vetatur in eo triduo. Et ratio, quæ additur, de cessante communionem,

nione, quia cessat osculum, ludicra est: Tum quia Sacerdos, etiamsi osculum non præcesserit, communicat singulis illis diebus. Ergò falsum est, osculum esse necessario præuium communioni, vt Hurtadus fabulatur. Tum etiam, quia reddenda fuerat ratio, cur in eo triduo negaretur pacis osculum; non oportebat autem dicere negatam esse communionem, quia osculum non præfigebatur. Vera autem ratio, cur osculum ex triduo non daretur, allata est à Raynaudo in Tractatione de Iuda; nempe, quia tunc recoleretur immane Iudæ basium, Christo proditoriè fixum, dignum visum est cessare à basio, saluo iure ad communionem. Hæc autem ratio, non cadit in Missas pro defunctis; Quidni ergo in eis vsurpabatur communio, si per eam poterant subleuari defuncti? Sed nimirum cum sacrificium, cuius effectus, vnus de variis est absterio reatus, celebraretur pro defunctis, visum est Ecclesiæ, sufficere medium à Christo ipso, in finem subleuandi defunctos prouisum interuentu Eucharistiæ, & bonum præcludere aditum errori, pro quo satagit Hurtadus de tam vberi fructu communionis pro defunctis. Itaque non exarmatur Raynau-
dus ab Hurtado, potenti telo, quod in eum intorquetur ex autoritate Ecclesiæ antiquæ.

Adduxerat pro se Raynaudus, silentium omnium Theologorum. Nemo quippè eorum, agendo de suffragiis, aut de fructibus Sacramentorum, numerans subsidia defunctis utilia, recensuit communionem, præter vnum, aut alterum, cui ante hoc trinoctium, venit in mentem, hoc falsum, vel pertenuè subsidium.

Hurtado quasi hoc telum declinaturus, ostentat auctoritates pro se facientes. Sed inter tot Theologos, vnicum potuit adducere, Gersonem; cuius testimo-

nio aliquos abuti dixerat Raynaudus. Et verissimè dixerat abusos, quia si vel perfunctoriè legatur Gerso, loco qui ex eo signatur, nihil prorsus, (ita planè prorsùs nihil,) habet pro communione pro mortuis, vt Raynaudus notauit num. 43. Et idem dicendum est de B. Ioanna à Cruce, & B. Gertrude, quas num. 51. retulerat, & nihil sibi incommodare notauerat; & nihilominùs allegantur in suam causam ab Hurtado, additâ calumniâ postcâ detergenda, quòd Raynaudus reuelationes sanctarum fœminarum reiiciat. Nunc peruelim, vt Hurtado, qua est in Philosophicis salebris facultate, expediat nodum petitioni B. Gertrudis implicitum. Expetebat enim sancta illa fœmina, vt Deus tot animas è Purgatorio erueret, quot erant partes in hostia, quam percipiebat; plures videlicet, quàm essent, vel fuissent, vel futuræ deinceps essent in Purgatorio animæ. Nam partes minimi continui, sunt infinitæ actu, iuxta probationem sententiam philosophicam. Animæ autem Purgatorij omnes, siue quæ in eò tunc erant, siue quæ fuerant, aut futuræ erant, numero finito comprehenduntur. Eia Hurtade; ad hoc? vel scinde, vel expedi hunc nodum, quem dextrè præteristi. Cabasilam item pro se profert Hurtado. Sed ipse Cabasilas fatetur, se hac in re nescire quid dicat. Itaque penitiùs mentem eius introspectit Hurtado, quàm spiritus hominis, qui in ipso est. Tribuit ei Hurtadus, quod dixerit, animas Purgatorij communicare spiritualiter, & sic eluere peccata venialia, quæ hinc exportarant. Hoc etiamsi ita esset, quid ad rem præsentem? Centum iuga bouum (vt alicubi iocatur Caietanus,) iuncta illi antecedenti, *animæ Purgatorij communicant spiritualiter, & sic extergunt maculas suas veniales,*
non

non possent trahere istud consequens. Ergo nostra communio prodest defunctis ex opere operato; vel etiam ex opere operantis, tanto fructu, qui sit dignus consideratione.

Subtexit antedictis Hurtado plenam concionem de usu communionis spiritualis ad subleuandos defunctos; de qua communione, quæ aliud non est, quàm desiderium reipsa communicandi, intelligendum esse ait illud Christi, *nisi manducaueritis carnem filij hominis, & biberitis eius sanguinem, non habebitis vitam in vobis.* Sed ea expositio est contra torrentem Patrum, & Doctorum, qui ea verba de reali manducatione simpliciter accipiunt, cum reliqua ferè tota disceptatione, quæ habetur c. 6. Ioannis, vnde is locus est depromptus, vt diligenter monstrant Ribera, Maldonatus, Toletus, Peterius ibi, nec non Cl. Sanctesius repetit 6. cap. 5. & 6. Et Alanus l. de Euch. c. 31. Vt vt verò sit, desiderium communicandi nullo modo ex opere operato, tenuissimè autem ex opere operantis subleuare potest defunctos, quantumcunque Hurtado declamiter, vel etiam muginetur.

§. VIII.

Scriptionis Hurtadi characterismus absolutè.

ESt cuique autori suus in scribendo genius, & scribendi characterismus. Hoc de præcipuis Christianæ doctrinæ Magistris, diligenter monstrauit Cassidorus l. diuin. lect. à c. 18. sicut enim non omnis fert omnia tellus, nec vnus singularis iustus omnibus virtutibus in summo collucet; sed in aliqua re-

gione aliquid oritur singulare, & inter Sanctos quisque sua decora præfert : Ita in scribendo, cuique scriptorum inest peculiare quippiam, quo ab aliis secernitur. Nolo in præsentia, Characterisimum scriptorum Hurtadi, ex omnibus, aut pluribus eius scriptioribus vestigare. Promulsis est, quam hîc exhibeo, ex vnica Hurtadi resolutione hætenus discussa; in tempore, de reliqui lolij vappa, fœculentiam, & acorem haud mediocrem propinaturus compluribus, nominatim ex Tract. 1. cap. 8. & 9. quo diffusè satis, nec minùs impudoratè excutit Clericorum, & Religiosorum (itane? etiam Religiosorum?) propudiosum ὕστερον πρῶτερον. Necessarium porrò est, Characterisimum scriptioris duplicem secernere, absolutum scilicet, ac respectiuum. Pertinent ad absolutum, maculæ illæ, inconstantia doctrinæ, asystasia, imperitia, & ruditas, ac denique alienorum subleſtio non in iudicio.

Inconstantiam doctrinæ, pro certa erroris nota habet S. Irenæus l. 3. c. 2. Quantoperè hoc dedecus, Hurtadum vel in hac vna lucubratione dehonestet; pauca, quæ subiicio specimina testatum facient. Dixit S. Thomam refellere eos catholicos, qui communionem ex opere operato Sacramenti prodesse Mortuis affirmabant. Et tamen num. 632. ait Raynaudum finxisse, quem feriret, cùm id impugnandum suscepit; quãdoquidem nemo Catholicus id vnquàm somniauit. Pari constantiæ laude num. 651 ait, fideles in exequiis charorum suorum pro eis communicare, vel alios ad communicandum conducere; & altè cachinnatur, audiens id negantem Raynaudum. Illicò tamen addit, haudquaquam id facere fideles in exequiis, quia expeditiùs illis est curare sacrificia.

Item

Item nu. 575. connititur aduersus cœlestis cibi manducationem per amicum nomine amici, cui commodare ea manducatione velit. Sed sui immemor, idipsum admittit num. 585. Acriter arguit Raynaudum num. 593. quod dixerit, radicem virtutis satisfactiuæ esse pœnalitatem. Statim verò num. 594. id euerit, admittens actus per se loquendo minimè omnium pœnales, summa vi satisfactiua pollere. Specimen id esto Constantiæ Hurtadi in dictis suis, ex unica eius resolutione.

Afystasia, illi perpetua est. Nec est opus, specimina inconsequentiarum eius annotare, cum tota hæc resolutio scateat huiusmodi ratiocinationum labruscis; & apud eum frequentissimè totum incipiat, totum pendeat ex altero; vt si legere quippiam ex eo velis, æquè finis futurus sit vbicunque te respiratio defecerit, vt de incohærentibus, & quidlibet ex quolibet assumentibus antagonistiæ sui discursibus dixit S. Hieronymus. Huius cordis inopiæ exempla singularia pleraque notata sunt à §. 3. vt frustrà pro aliquibus hîc signandis satagerem. Pertinent ad eandem cordis inopiam crebra, & longa parerga, in quæ absque iudicio euagatur, occasione vnus ratiunculæ contexendæ, quæ cum vno verbo tangi potuisset, ab Hurtado tamen longa parabasi instituta, prolixè diffunditur. Testis exspatiatio de gaudiis animarum Purgatorij, de modo, quo Indulgentia confert effectum suum, de communione spiritali, & alia non pauca.

Ruditatis, ac imperitiæ specimina in Hurtado tenemus, cum Cabasilam à Raynaudo schismatis, ac hæreseos insinulatum, purgat ab vtraque nota, fretus autoritate Gentiani Herueti, quem videtur habuisse

buisse pro aliquo veteri Ecclesiæ Patre, cum tamen nuperus sit scriptor, nec alio titulo, quàm Rhemen-
sis Canonici, & aliquorum librorum Græcanicorum in Latinam linguam interpretatione conspicuus. Quod verò Raynaudo repositurus, Theodoretum ab ipso allegatum tanquam Catholicum, schismaticis Græcis accenset Hurtado; Næ suam peritiam sacræ historiæ dat expressam vncialibus literis, cum constet, quot sæculorum centuriis Theodoretus, schisma Græcorum autore Photio inductum præcesserit; & nitentis eius doctrinæ ab omni hæresi alienæ, locuples testimonium perhibuerit, qui eum sibi supplicem factum texit Leo Magnus. Pari eruditionis profunditate Hurtado, Gersonem facit Decanum; insignis haud dubiè alicuius Ecclesiæ caput fuisse arbitratus, quia inaudiuerat eum fuisse *Cancellarium*, quod ei perinde sonat, atque *Decanus*. At Gerſo Parochus quidem fuit S. Ioannis in Grauiâ; Decanus tamen nullibi, nisi apud Hurtadum audiuit, qui ne Canonicus quidem fuit. Inter S. Dionysij interpretes, numerat Pachymeram, quasi altera quædam Hypatia esset, quæ S. Dionysium Commentariis illustrasset. Causam negatæ olim laicis diuinæ Eucharistiæ in Missis defunctorum, refert in exclusum ab illis Missis osculum pacis, quod excludebatur in Parasceue; quasi quod non sit in Parasceue, vbi nullum peragitur sacrificium, debuerit æquè non fieri in Missis defunctorum, quæ esse vera sacrificia, est extra dubium. Vera autem ratio exclusi tunc osculi solos hospites in Ecclesiastica Historia latet, traditurque à Raynaudo in Tractatione de Iuda.

Thraſonismi, in scriptione Hurtadi, sunt perpetui. Omnia eius argumenta sunt euidentia, demonstratiua,

stratiua, apodictica, ineluctabilia. Quod nolim prætergredi fines resolutionis, quam suscepi discutiendam; omitto frontem operis, vbi se Doctorem ter maximum, hîc & ibi, & alibi denominat, vt vix Iustinianus, summus titulorum auceps, ex longiore formula prætexuerit suos titulos. Tametsi fuit, qui subdubitarer, quo fundamento Hurtado, qui in Cœnobio S. Agneris in Agone, paucis suis fratribus, prælegit aliquam partem siue Philosophici, siue Theologici minuti loquij, dicat se præter cætera *Roma publicum Professore*. Ille etiam, exiguus licet, tamen subpungens scrupulus sollicitauit non neminem; cum in struice titulorum suorum, quos in eadem libri fronte sibi appinxit Thomas Hurtado Clericus Regularis, indigitatum eum vidit *Proprietarium in vniuersitate Hispalensi primariæ Cathedræ Theologicæ*, pingui pro tanta vrbe stipendio honestatæ, *moderatore*. Et ratio dubitandi, quæ tantum Magistrum non later, ducitur ex Innocentij III. decantata apud Canonum Doctores sententia, quod Religiosum esse proprietarium, perinde sit, atque non esse Religiosum: Ita vt ne Pontifex quidem, tametsi Summus Ecclesiæ Rector, dispensare possit cum Religioso, vt salua Religione sit Proprietarius; nec plus queat Pontifex Religioso indulgere, vt sit proprietarius, quàm vt sit maritus. Itaque fortassis nihil fuisse incommodi, si syllabus titulorum Hurtadi, prætextus fronti voluminis, hoc minùs benè sonante decurtatus prodisset. Manifestè verò Alastorem agit Hurtado, num. 649. cùm se vocat *Tubam veritatis, qua personante, muros sententiæ Raynaudi, corruiere necesse fuerit*. Sed concinnè num. 591. adhibitis verbis Hieronymi in erronem, sic insultat Raynaudo; *Hanc*

hastam, quam totis viribus misisti, de qua nobis miniraris, uno (ut aiunt) digiuulo repellam. Thomas Bradvvardinus in Opere de causa Dei, hos animos erumpere dicit in audaciam Nembrotheam, atque Giganteam, solo obiectu perterricrepam.

Sublectio alienorum, Hurtado perpetua, infami plagio est contermina. Tota hæc lucubratio, quam hîc expendimus, turget expilatione opellæ, quam exagitat; nisi quod caput transuertit in caudam, & viceversa. Nimirum quæ Raynaudus pro more Scholasticorum præstruit disputationi, quasi in fauorem falsæ sententiæ postea abiiciendæ, Hurtadus pro sua sententia proposuit: Et quæ Raynaudus pro sua opinione adduxit, Hurtado sibi obiicit, & diluenda assumit, vix vllis additis ad ea quæ Raynaudus proposuerat. Longas lacinias è recentiorum libris passim, & vbique prostantibus suæ mastrucæ atrexit. Quem enim deficit Suarez, vel Turrianus, & similes moderni? Saginat exscriptis verbatim prælongis eorum locis Hurtado scriptionem suam, ignobiliter tumefaciens volumen. Nam tametsi ex Patribus, & antiquis id præstari cum laude potest, & præstitum nominatim est ab Eusebio in opere de Præparatione, & à Theodoro to agente contra Græcos; tamen quod recentiorum libri, qui versantur omnium manibus, adeundem modum sublegantur, ut opus subuentaneum augeat, & voluntaria orbis terrarum aggrauatio per novos libros alienis plumis cōuestitos probrosus est. At fecit hoc Diana? Sed ille, ut plurimuū hoc fecit in libris, qui non sunt omnibus ad manum, atque adeò qui non possent à Lectore consuli, si nudè allegarentur. Ut ut verò sit, Diana vir bonus est, & nemini fastidium vnquam creauit, censens de aliis moderatè, atque honestè

honestè: nulli inquam, mordendo, aut calumniando, vel immodestè se gerendo infestus fuit: atque adeò non eam præbuit occasionem id sibi obiiciendi, quam præbuit Hurtado.

In summa vniuersus contextus scriptionis Hurtadi Pilosi, refert plicam Polonicam, quæ quis in Capillagine morbus sit, & quàm malè afficiat miserum eius proprietarium, docet Rector Academiae Zamoscientis, Epistola ad medicos Patauinos; nec non Tardinus disquisitione de Pilis cap. 9. ac Hercules Saxonia l. 10. medicinæ practicæ cap. 11.

§. IX.

*De eodem Characterismo scriptionum
Hurtadi, respectiue.*

Characterismus scriptionis Hurtadi absolute spectatus, exhibuit plicam Polonicam, veram corporis, cuius pilum inficit, vastitatem. Idem Characterismus respectiue spectatus, hunc pilosum Esau, & degenerem Isaacidem, exhibebit anguinea instructum pilositate, qualem fabulæ tribuunt capiti Gorgonis, cui pro Capillagine erat coma anguinea. Quid enim aliud est virulenta mordacitas, calumniandi scabies, petulcitas cachinnatrix, mendax de aliis oblocutio, quam plexus anguineus operiens caput? At eiusmodi esse Hurtadi scriptionem, pauca de plurimis, quas subiicio, furuæ ex ea plagulæ manifestabunt.

Numero 576. Aggrediens ad Raynaudi impugnationem sic auspicatur. *Non possum non mirari virum alias, & valde eruditum, & pium, ita stomachantem aduersus usum, qui & pius, & rationalis potest fab-*

uari: cum ad excitandam compassionem animarum Purgatorij, & ardens desiderium eas iuuandi: Tum etiam non mediocrem deuotionem in venerabile Eucharistia Sacramentum: Et sub specie pietatis, & religionis hoc leuamen animabus carceri mancipatis auferendum. Beneuolus quidem Trucidator, cum à num. 27. usque ad 42. totus est in minuendo in Communione ex opere operantis applicata defunctis, vires, efficaciam, satisfactionem, & impetrationem. Sed Deo adiuvante, me pro animabus Purgatorij dimicante, manifestè ostendam, friuola esse ea, quæ ad hoc intentum probandum inducit, & ut dici solet, Cyclobori voces esse, quas multiplicat. Extremum hoc conuitium monstrat Hurtadum ne legere quidem Græcè nosse. Cùm enim sit apud Suidam, Cyclobori voces, id est, male & absone, rapacis vociferatoris, à Cycloboro Atticæ fluuii obstrepero, ipse Cyclobori voces legit, ne conuitiari quidem appositè sciens, tanta est profunditas eloquij Hurtadiani scribendo pergræcantis ut dici solet; reddam enim par pari. Tu quod Raynaudum animarum trucidatorem voces, & quidem bonum, quasi esset aliquis bonus carnifex; accipe hæc ipsa de te. Nam qui fame pereunti non nisi planè exsuccum, & ægerrimè edule pabulum vult porrigi, cùm posset optimum, & fulciendæ vitæ accommodatum subministrare, ille bonus trucidator foret: Tu famelicis in Purgatorio animabus, inane & leuadæ fami vix aptum edulium specie pietatis vis porrigi, cùm posses Missas, macerationem corporis, eleemosynas, & alia valdè, & verè satisfactiua, vel orationes intentas, & prolixas pro eis suscipere, quibus solidè, & non fūco tenus leuarentur. Ringere ut voles. falsa sunt abicienda remedia, quæ veris sunt periculis grauiora.

Num. 593. *Existimo Raynaudum magis deditum fuisse latinitati, in qua fateor pollere: quam in intelligentia Doctorum Sacrae Theologiae, quos malè intellexit. Et dum citat equum, incitare deberet iuxta Nyfam, ut ait Naz. in Orat. de S. Paschate. Etenim ab scopo ipsorum errat, dum in sui patrocinium inducit, cum longè alterius, imò oppositæ mentis sint, ut iam demonstro.* Iudicium Hurradi de bona Theophili latinitate, quanti esse debeat, proximè aperiā, siliquas, & glandes latinitatis Hurradianæ excutens. De Codice item Nazianzeni, qui apud Hurradum solum legitur, suprà iam est dictum. Nunc ajo, Hurradi oscitantiam, & abeirationem à Nyfa, inde patere, quod in hoc ipso negotio, in quo ait Theophilum exerrasse, ipse ibidem apertè exoculatus est, cum idem cogatur dicere, quod Theophilus dixerat: nempe pœnalitatem operis esse radicem virtutis satisfactiua; pœnalitatem autem, quia non est Nugipoliloquides, accipit pro duritie & imbonitate operis, vel perpeffionis carnem affligentis, contrà quàm Hurrado totus molliculus, operibus longè suauissimis eam annectit, perabsurdè, ut suprà monstratum est.

Num. 603. *Raynaudus audaciter dicit, non esse adhibendam fidem reuelationibus, hoc est, S. Brigida, Gertruda, ac similium Sanctarum mulierum.* Hoc, est audax mendacium Hurradi: Nam Raynaudus nihil tale dixit. Consulatur locus eius, & liquebit de impostura. Peruelim verò scire, quid diceret Hurrado de responso Thomistarum, cum vrgentur testimonio S. Brigittæ affirmantis, reuelatum sibi esse, conceptionem passiuam Deiparae, fuisse immaculatam.

Num. 607. *exscripta integra pagina Raynaudi, probantis, Communionem, prout est actus noster, esse*

tenue subsidium in ratione impetrationis ; eam sub-
lectionem alieni operis obsignat Hurtado hac clausu-
la. *Hac ille. Quo animo. nescio.* Vis scire , quo ani-
mo ? planè animo dedocendi , quo tu implanas ; &
curandi , vt non falsa , ac incongrua remedia leuandis
animabus adhibeantur , (qualia tu deludens miseras
animas , & simplices fideles , adhibenda doces ,) sed
solida , apta , vtilia : putà missas , cilicia , flagellatio-
nes , elemosynas , & huiusmodi alia.

Num. 619. *Mirum est , quantum extenuet Raynaudus , mortuorum subsidia. Videtur quidem , vt dicebat ille , mortuos flagellare. Quare versus Tiresia ad Creontem , quos ponit Sophocles in Antigona , illi non ineptè aptantur. Age , mortuo concede , nec qui extinctus , stimulat. Quenam est fortitudo , mortuum necare rursum ? Quenam est pietatis valentia , & qua in studiis fortitudo , mortuum necare rursum ? Deuotionem fidelium infrigidando , dum tantum extenuat tam excellens suffragium Communionis , imò & Orationis , qua funditur pro ipsis ? Hic limbus continet mendacium Hurtadi , non dictum Raynaudi ; qui valdè commendat Orationes pro defunctis , præsertim prout satisfactorias , ratione laboris , qui eis adiungi potest ; quamuis nudè vt impetratorias , neget esse componendas cum Missis , flagellationibus , & aliis bonum litrum annumerantibus Deo , pro animabus illis. Quod verò , bone Hurtado , communionem præcisè vt perceptio est , ac labore vacat , & impetratione , vis esse tam excellens suffragium ; hoc tu dicis , sed non probas , vt manifestè est demonstratum. Et eadem scopâ euerritur calumniosa amplificatio , quæ ibidem subiicitur à Cyclobori voces multiplicante , quasi extenuârit Raynaudus Sanctorum pro nobis Orationes.*

Num. 632. De Theophilo refellente, dicentes, Communionem iuuare mortuos ex opere operato perceptionis, ait Hurtado: *finxit, quem feriret, quia nemo Catholicus id somniauit.* Ain? Ergo S. Thomas finxit, quem feriret, quem tu ipse num. 575. affirmas hoc refutasse, & laicos ex eo sensu pro mortuis Communicantes erroris damnaſſe. Sed vide tuam in mordendo temeritatem, ni mauiſ, malignitatem. Tentas perſuadere, Theophilum hoc opusculo eſſe Rhetoricatum, quod æquè S. Hieronymo impactum eſſe in eiſdem aduerſus Vigilantium inuectiua habetur. At Theophilus quamuiſ nomen primarij concertatoris ex ordine S. Auguſtini, publicè diſſeminantem furſures illos doctrinæ; conſultò periphraſticè tantum propoſuit; Nec item expreſſit nomina duorum aliorum, qui vulgatiſ libelliſ eadem abuſione orbem implebant: tamen ex tot adiunctiſ, quæ ſignauit n. 1. & num. 25. non putauit quemquam adeò duri oris & capitiſ futurum, vt id gratis conſictum diceret, & mentionem impingeret viro bono, affirmanti, eſſe, qui hoc perſuadere tentarent, & Bertabus inſuſurrarent, non minùſ ipſas deſunctoſ iuuare Communicando, quàm Sacerdoteſ ſacrificando. Sed Hurtadio caſim, ac punctim ferire, nec mortuoſ tantum, ſed & viuoſ anguinâ linguâ trucidare, mentioneſ prohibito intorquere, luduſ ac iocuſ eſt. Hoc non eſt in pyxide ſpirituſ calamum intingere, vt de Baſilio dixit S. Gregoriuſ Nazianz. & de ſuo Sergio Piſidaſ; ſed quod Nicolauſ I. de maledico Græculo, Epift. 9. affirmauit, hoc eſt, intingere ſcriptoriâ pennam in Colubri gutture, & pro dictionibuſ venena fundere.

Redrantras Hurtade ſiccine agitur cum Religioſo Magiſtro, in tot vniverſitatibuſ publico profeſſore,

& in Hispalensi Cathedratico Proprietario? Tu autem quid? Intriuisti tibi moretum, ex alliis tuis, ac vrticis, & Carduis: quod intriuiſti, hoc Comede. Si adeò cordi fuerat, Raynaudum refellere, & Communionem pro mortuis ſtabilire, nemo verabar; ſed modeſtè, & religioſè id abs te factum opportuerat. Memor quippe eſſe debebas, pronuntiaſſe Origenem, conuitiis, & ſannis agere; plebeij eſſe, & infruniti, non diſputatoris ſapientis. Quare non es imitatus Reuerendiſſimum Raphaëlem Auerſa, antehac tuum Generalem Præpoſitum, ſcriptorem omni meo encomio ſuperiorem, doctrinæ vberrate, perſpicua methodo, accuratione ſingularem; temperatione verò tanta, vt nullum vnquam tametſi ſibi non probatum ſugillet aſperius; ſed contentus, validis rationibus veritatem, pro qua ſtat, ſtabiliuiſſe, nihil amarum, aut horrens addat, omnia verò eius in Charitate ſunt. Aliam tu viam inuiſti. Quare ne inhorreſce ſicut mulus ſcabioſas aduerſùs ſtrigilem. Non te lateret vetus paræmia, *Qui dicte quod non debet, audiat quod non vult.*

§. X.

*Encomium Theophilo ab Hurtado de-
pactum quale.*

NON ſemper imbres nubibus hiſpidos manant in agros; temperandum quandoque eſt acerbiori tractatione. Itaque Hurtado, tam multis dehoneſtatum probris Raynaudum mulcere voluit, depacto ei Elogio, ſed quod eſt vini vapidum cum felle miſti promulſis.

Nunc igitur n. 591. exscripta è Theophili libro latinia, addit. *Hac ille. Bene satis iuxta locutionem latinam, Donato conformem. Sed vereor, ne modus iste loquendi, pietati sit aliquatenus difformis.* Et mox num. 593. *Existimo Raynaudum magis deditum fuisse latinitati, in qua fateor pollere, quam in intelligentia Doctorum Sacre Theologiæ, quos malè intellexit.* Si Hurtado intelligit, quod dicit, & verbum fuisse, non ignorat esse præteriti temporis, haud dubiè supponit, Theophilum esse fato functum. De superstite enim, Rudimentarius Grammaticus non diceret, *existimo fuisse*, sed diceret, *existimo esse*. Itaque bonus trucidator Hurtado, mortuum cædit. Et quæ est ista pietatis Valentia, &c. quæ ineptiendo cæcus iste Tiresias ex Sophocleæ Tragædia alienis oculis perlecta adducit. Sed Raynaudus, Deo gratia, nondum est pluribus annumeratus. Et ubi audierit, quæ in ipsum laudationis specie effutiuit Hurtadus, hanc esse dicet laudem non laudem: nec tantum astutam laudem, quam defricare validè possit (adhibitis iis, quæ in eam laudis larvam eruditè pro more suo addensat Sherlogus anteloq. 4. tota sect. 5.) sed iniuriosam, & probri refertam conuitiationem.

Hoc ut intelligatur, recolendum est, protritum illud, laudem à laudato viro delatam, magni esse faciendam. E contrario autem laus ab imperito rei, quam laudat, ad vituperationem potius pertinet; non secus ac si cæcus colores tabellæ impositos à vividitate commendaret, aut si Petro quispiam, & Rupex, à facundia, aut doctrinæ profunditate oratorem sacrum celebraret. Non esset sanè speciosa laus illa, nec esset oratori, idoneum inflationis, & tumoris argumentum. Quanti ergo esse debet apud

Theophilum , quod à latinitate collaudetur per hominem latinitatis ignorantissimum , cuiusmodi est Thomas Hurtado , qui vix vnam emisit Periodum , quæ non sordeat sribilagine aliqua Grammatica , & indigna colaphizatione Prisciani? Non est diu vagandum per molem reliqui voluminis. Hæc ipsa sola resolutio, Hurtadi supinitatum Grammaticarum feracissima , satis superque euincit , eum in latinitate non pollere. Eiusmodi nominatim est, quod ait n. 106. *Deus expanseit nos*, cùm vellet dicere, *Deus pauorem nobis iniecit*. Et num. 600. *Opus benè executum*, cùm dicendum esset, *executioni mandatum*: quia *exquor* non est verbum passiuum, vel commune. Et n. 640. *Debet populus magis exhortari ad Communionem, quàm ad alia opera pro mortuis subleuandis*. Heus tu, *exhortari*, est verbum deponens. Quare caue tibi ab Orbilio, & eius scutica, faciens *exhortor* verbum passiuum. Omitto quod alibi *de osculis*, & *tactis* admodum inuerecundè agis, nihil reueritus venerandam Donati canitiem, à qua audire potueras, (certè debueras) *Tactum*, esse vocem quarre declinationis, nec agendum tibi fuisse *de tactis*, sed *de tactibus*. Nec potes causari mendum Typographicum in tam frequenti, totiesque iterata mentione *de tactis*. Ioannem Sanchez, quia scripsit *selecta*, vocas Sanchez *selectum*, cùm in bona Grammatica deberes vocare *selectorem*. Alibi, tuum est gemmeum illud eloquium, *Hæc sententia debet amplecti ab omnibus*, viderit Petrus de Quiros Hurtadi Discipulus, abutens verbis Petri Blesensis, vbi illa venustas, & florulentia sermonis fragret, quam in Hurtado suo celebrat Hominem itaque infantissimum, à quo toties vapulant Priscianus & Donatus, sedere latinitatis probatæ arbitrium, &

laudare

laudare alicuius latinitem, laus est euanida, & quæ laudato, inflationis occasionem non præbeat, velut si à Ioanne Mariana, Gaspare Sancio, Hieronymo Osorio, Petro Maffei, Ioanne Antonio Velasquez aut similibus præberetur. Delata autem ab Hurtado, homine infantissimo, nugatoria est, friuola est, inepta est, iustius dixerim, probum est, atque conuitium.

Neque hoc dico, magnum esse Hurtadi dedecus, quod lapides loquatur, quod eius scriptio densis horreat solæcismis, quod politas aures verberet tam impexa eius, & horrida dictio. Hoc illi condonatur. Scimus enim, PP. vix vlllo loco haberet cultū, & mundum vernantis dictionis: & aucupes cupediarum latinities, ad rostra porius, quàm ad sacra subsellia amandandos decernere; quod Theophilus in præludiis ad syntagma de libris propriis, ad criminationem secundam, copiosè illustrat. Hoc igitur non vrgeo, sed indignum esse pronuntio, & quod supra omnia intorra ab Hurtado conuitia Theophilum meritò pessimè habere debeat, Hurtadum, hominem lingua rusticanum, comprobatores agere latinities Theophili: & eo ipso occasionem cordatis dare, existimandi Theophilum, (quæcunque demum sit eius latinitas) perparum latinè nosse, qui ab homine toties violatæ latinities reo, & Romanæ eloquentiæ carnifice, à bona latinitate collaudetur: Idque ea astuta laude quæsisse Hurtadum, qui dixerit, fortassè ad Nysam equum incitauerit.

Non plura in præsentia, Hurtade. Expecta me, donec reueniam, & excussis planè tuis cum in alios, tū nominatim in Societatis Jesu, primarios quosque Doctores allatrationibus, & demorsionibus, expe-

52 *Thomas Hurtado vulsus ac depil.*

riare , inconsultissimè abs te factum , cùm leonis de-
mortui (vt quidem arbitrabare:) barbam vulsisti, & le-
tho iam datum , bone Trucidator , strictâ in eum ma-
chæra , confodisti.

FINIS.

